

Vun driweriwer

erscheint auf www.lenauheim.de

monatliche
Erscheinung

September 2010

von *Helen Alba*

„Die tanze ohne End!“

De Vater laaft der Mutter....

...mit der Wixberscht noh! Mit dem Tanz hat die Billeder Jugendtanzgrupp „Heiderose“ in Lenauheim, beim Fescht „Kinder des Dorfes“, ihre Darbietung anfang. Sie ware in der Kerweitracht angezoo un han derfor gsorcht, dass Stimmung in de Saal kummt. Un des is ihne aach gelung. Die Leit han geplätscht un mit de Fiess mitgetappt. Un ich han nor staune kenne: na ja, es sin jungi Leit! Die sin iwerhaupscht nit mied gin – un vum ins Schwitze kumme, gar ke Red.

Newer mir hat de Vetter Adi Csonti, der wu in Billed de Forumsvorsitzender is, ghuckt. Un wie die Trachtephaare sich verneigt han noh alli Seite un naus gstolziert sin, han ich ne mol gfroot, ob mer nit Zugabe rufe soll, dass se weitertanze. Do hat de Vetter Adi ruhich gement: „Breicht der nit! Die tanze ohne End!“ Un des war a so. Sie sin nochmol in de Saal un han weitergetanzt. Dernoh nochmol naus, wieder rin – in eem fort, nor getanzt un gejucheet. Zu guterletscht han se noch de Bännertanz vorgfiehrt, un schaad – sie sin nimi zruckkumm for weitertanze.

Im Wertshaus ware die Tische wie bei eener Hochzeit ufgstellt un gedeckt. Un mit eem Marsch sin die Weiwer in weisser Scherz mit der Nudlsupp rinmaschiert. Dernoh hats gfilltes Kraut, Bradl un Salat un Kuche gin. Während em Esse hat es Orchester vum Temeschwarer Deutsche Staatstheater zum Tanz ufgspilt un die Schadater han zwischedorch schun anfangt, es Tanzbeen zu schwinge.

Ich han villi Bekannti getroff un ach es Verzähle hat ke End holle wille. De Vetter Fredi Mühlroth hat mer ufmol e Brief in die Hand gedrickt, mit de Aue geblinselt un gsaat, des wär e Liebesbrief. Un wie ich ne ufmach – ja do han ich mich stark gfreit. Es ware im Brief Beiträch for unser Pipatsch. Un do hat er mit dem Liebesbrief sogar recht ghat. Weil er schreibt doch in Schwowisch, weil des ihm Gfalles macht – un aus Liebe zum Banat, zu Schadat un zu unsrer Pipatsch.

De Vetter Werner Griebel, HOG Vorsitzender, war mit seiner ganz Familie aus Deutschland angereist. Sie han ach vill zu tun ghat, damit alles gut ablaafe soll, dass die Leit sich gut fiehle – un des is ihne aach gelung.

De Schadater Richter Ilie Suciu hat ach sei Beitrach geleischt, zamt em Gemeinderat natierlich. Ach de Mann muss ich lowe. Was vor ihm kenner instand war, des hat er bewerkstelligt (natierlich mit finanzieller Unerstitzung vum Temescher Kreisrat): mer kann seider phaar Wuche uf eener Asphaltstrooss vun Schadat uf Bogarosch fahre, was e grossi Erleichterung is for alli Autofahrer. Weil die finf Kilometer ware e Schreck, Schock, oder was schun immer, for alli.